



Sacerdos Aut Sanctus Aut Reprobus

Dufrène, Maximilian

Augustæ Vindelicorum, 1743

Caput. 7. Ad validius confirmandam præcedentem doctrinam ostenditur,
quanti referat cum spirituali lætitiae sensu Deo servire.

[urn:nbn:de:hbz:466:1-60483](#)

sum circa hanc ipsam familiaris, & jucundi
erga DEUM amoris memoriam, scitè olim
Christus Dominus charissimæ suæ sponsæ
Gertrudi inculcavit: reprehendens eam ,
quòd indignè ferret , à quadam ex cœnobii
sororibus cum trepidatione potius, quàm
cum fiducia , & hilaritate ad lacram Syna-
xin accedi, quid enim? (cœlestis Magistri
oratio fuit) Nonne consideras, quòd non mi-
nus dignè debetur mihi reverentia honoris , quàm
dulcedo amoris ? Sed, cùm defectus fragilitatis
humanæ nequeat utrumque perficere ; cùm vos sitis
invicem membra, dignum est, ut , quod per se
quælibet non potest perficere , recuperet per aliam:
e. g. qui magis dulci amore affectus , reverentia
minùs assequitur ; pro se suppletum gaudeat ab illo,
qui magis intendit reverentia : & vicissim deside-
ret, illum obtinere solatia unionis divinæ. (Infin.
l. 3. c. 10.)

CAPUT VII.

*Ad validius confirmandam præ-
cedentem doctrinam ostenditur, quanti refe-
rat cum spiritualis lætitia sensu DEO
famulari.*

Spiritualis lætitia, prout ipsum nomen so-
nat, illa est, quam hominis animus per-
cipit ex suis spiritualibus bonis: quòd
nimirum à Deo in filii, & amici loco habeau-
tur, quòd sub tutela ejus vivat, quòdque
brevi

brevi aditum sempiternam cœlestis illius regni hæreditatem se speret. Quàm firmas sanctioris vitæ Professores habeant causas lætandi de possessione partim in præsenti , partim in futurum promissa tam incomparabilium bonorum satis demonstratum à nobis jam est. Supereft hic demonstrare, quàm prvidè item , sapientérque rationibus suis consulent , si hujusmodi interiorem lætitiam fore in suis animis curent , reputando idem secum exuperantissimam felicitatem , quam in Deo summo, infinitóque bono, ceu illius filii, amici, & hæredes repositam habent. Quæ appendix præter fructum , quem vel sola sui cognitione afferre nata est; novum quoque præcedenti doctrinæ firmamentum adjicet , planiúsque ostendet , quàm à vero procul devii ferantur , qui nullam reperiri posse absque jugi moerore solidam humilitatem existimant , omnémque in spiritualium virorum animis ex Deo haustæ dulcedinis sensum , tanquam vanitatis , arrogantiæque somitem anxiis dubitationibus, & conscientiæ terroribus perturbare contendunt: ea de causa in errorem abducti , quòd profanam vulgarémque lætitiam non satis distinguant à supernaturali & divina : quæ, cùm Deum ipsum, bonum infinitum pro materia gaudendi habeat; nunquam sanè potest in gaudendo modum excedere ; imò quantò major in animo est, tantò illum plus perficit : prout cum maximo suo bono

ex-

experiuntur beati Cœlites , & prout facile agnituros omnes confido , qui rei veritatem seu in rationis , seu in authoritatis trutina pensitare mecum voluerint.

2. Et primò , si stare authoritati volumus , nullum reperiri ajo in sacris literis locum , qui DEI famulos exultare in eo vetet : sed , si alicubi mœrorem audimus præferri lœtitiæ , ceu exempli gratiâ in illo Salomonis effato , (*Eccles. 7.*) *Cor sapientum , ubi tristitia est , & cor stultorum , ubi lœtitia ;* nemini esse dubium posse , quin ibi tristitiæ nomine gravitas , & modestia ; lœtitiæ verò intemperantia , & procacitas designetur . Cæterùm , quod ad jucunditatem spectat in iustorum animos ex DEO profluentem ; nullum scribendi finem facerem , si omnia hic vellem colligere , quæ in hagiographis voluminibus passim occurrunt præconia . Libeat pauca quedam audire , & primùm ea , quibus David suos Psalmos referit : (*Ps. 63. 149. 30. 85. 50. 88. 104. 99. 33. 94. 31.*) jam affirmans proprium servorum Dei esse , gaudio , & lœtitia affici : *Lœtabitur iustus in Domino . Exultabunt Sancti in gloriâ , lœtabuntur in cubilibus suis . Quam magna multitudo dulcedinis tuae , Domine , quam abscondisti timentibus te !* jam DEUM orans , ut cœlesti hoc nectarare sibi animam nutriat , & recreet : *Lœtifica animam servi tui . Quoniam tu Domine suavis , & mitis . Redde mihi lœtitiam salutaris tui , & spiritu principali confirma me ;* jam beatum

tum appellans, qui hanc sincerissimæ jucunditatis venam repererit: *Beatus populus, qui scit jubilationem;* jam omnes invitans, cohortansque ad veniendum in tantæ beatitudinis partem: *Lætetur cor quærentium Dominum. Servite Domino in lætitia: introite in conspectu ejus in exultatione.* *Gustate, & videte, quoniam suavis est Dominus.* *Venite, exultemus Domino, jubilemus DEO salutari nostro.* *Lætamini in Domino, & exultate justi, & gloriamini omnes recti corde.* Succedit ei Salomon, paternorum hæres sensuum, in jucunditate animi præhabenda tristitiæ, cùm de hac scribat: (*Prov. 25.*) *Sicut tinea vestimento, & vermis ligno, ita tristitia viri nocet cordi:* illam verò tanti faciat, ut profiteatur; se intellexisse, (*Eccles. 3.*) *Quod non sit melius, quam latari, & facere bene.* Succedit item Ecclesiasticus, qui veluti in lætitia constituit vitam, (*c. 3.*) *Jucunditas cordis vita hominis;* sic affectionem contrariam prohibendam esse ab animo docet, tanquam prorsus inutilem, imò & mortiferam, *tristitiam longè repelle, multos enim occidit tristitia, & non est utilitas in illa.* Neque luculenta minùs nobis suppeditant testimonia duo Apostolorum Principes, Petrus, atque Paulus: quorum prior exhortans fideles ad animi vitam cælesti pabulo alendam, (*Ep. 1. c. 2.*) *Rationabile sine dolo lac concupiscite, ut in eo crescatis in salutem;* addit conditionis locò, *si tamen gustastis, quoniam dulcis est Dominus:* perinde quasi,

se-

secundūm Hugonis Cardinalis interpretationem, dicat: *Hoc poteritis facere, si quanta sit dulcedo divina, sapitis.* Alter verò adeò multus est, in commendanda novellis Christianæ fidei sectatoribus interiori lætitia, ut vel unus sufficere possit, ad eam contra importunas scrupulosi cujusque censoris oblocutiones tuendam. Quid enim? nonne magnum hunc gentium Doctorem audimus optare, & precari Romanis uberrimam spei, pacis, gaudiique affluentiam? (c. 15.) *DEus autem spei repleat vos omni gaudio, & pace in credendo, ut abundetis in spe.* Nónne idem ferè Colossensibus, ac Philippensibus repetit, scribens illis: (c. 3.) *Pax Christi exultet in cordibus vestris; his verò (c. 2.) & pax DEI, quæ exuperat omnem sensum, custodiat corda vestra?* Nónne in Epistola ad Galatas ex Spiritu sancti fructibus primos enumerauit, charitatem, gaudium, & pacem? (c. 5.) *Fructus autem spiritus est charitas, gaudium, pax.* Nónne Thessalonicenses, tum eos, qui Philippis erant, Neophytes gaudere perpetim jubet, (1. ad Thes. 6. 5. ad Phil. c. 3. & 4.) hósque præsertim posteriores tam studiosè, & solicite, ut videatur præcepti tam suavis repetitione expleri non posse? Nam & tertium datæ ad illos Epistolæ caput exorditur his verbis: *De cætero, fratres, gaudete in Domino. Eadem vobis scribere mihi quidem non pigrum, vobis autem necessarium;* & in sequenti capite rursus inculca-

culcare idem pergit: *Gaudete in Domino semper, iterum dico, gaudete.* Reliquum est, ut has omnes, aliasque ejusdem generis testificationes claudat Christi Domini authoritas: qui adeò nunquam improbare se ostendit, quod animæ suæ sponsæ, atque filiæ de interiori secum conversatione exultarent, ut potius inconsultæ severitatis damnaverit, qui vel externam Apostolorum se præsente hilaritatem carpebant, dicens: (*Matth. c. 9.*) *Numquid possunt filii sponsi lugere, quamdiu cum illis est sponsus?* Et eosdem Apostolos, inque illis omnes suos famulos adhortatus disertissimè est, ad lætandum de promissis sibi ab ipso cælestibus bonis: *Gaudete, inquiens, quod nomina vestra scripta sunt in cælis. Gaudete, & exultate. Ecce enim merces vestra multa est in cælo.* (*Luc. 10. & 6.*)

3. Neque mirum profectò videri debet, quod eximiè adeò in divinis Literis commendetur spiritualis lætitia. Nimiùm quām excellentis pretii, manifestæque sunt, quæ illinc utilitates proveniunt. Provenit primò sensibilium voluptatum contemptus: DEO siquidem fruens anima, cùm pabulum ibi inveniat quovis nectare suavius, nihil causæ jam habet, cur Ægypti ollis, cepisque inhiet: quarum alioquin ceu naturaliter appetentissima est, sic ægerrimè abstinentiam posset ferre, nisi earum gustus hac sibi compensaretur præstantiori dulcedine. Nimirum, teste D. Gregorio, (*L. 18 Mor. c. 8.*)

Esse sine delectatione anima nunquam potest: eaque si omnino destituatur, nihilo minorem patitur vim, ac natura pateretur ex vacuo. Quare cœlestibus oblectamentis carens necesse est, ut innato, & sensibili appetitu ad terrena vehementer propendeat: quemadmodum usuvenire in profanis hominibus cernimus: qui, quod interiori, divinaque non fruantur dulcedine; nullo pacto continere se posse à corporeis voluptatibus dictitant. Cùm è contrario spirituales viri, *qui que gustaverunt, quoniam dulcis est Dominus,* quasvis facilè respuant sensibilium delectationum illecebras: exemplo D. Petri, cui vel unica cœlestis hujus pabuli in Thabore degustatio suffecit, ut terrena omnia aspernatus exclamaret. (*Matth. 17.*) *Domine, bonum est nos hic esse.* Ita sanè (inquit Author soliloquiorum cum Deo, quæ D. Augustino adscribuntur) *Unam stillam gustavit, & omnem aliam fastidivit dulcedinem.* (c. 22.) Unde magnus ille Monachorum Pater D. Antonius, suos alumnos monebat, ut hoc præcipue munimenti genere contra hostis tartarei oppugnationes uterentur: *Una est, dicens, ratio vincendi inimicum, latitia spiritialis, & animæ Dominum semper cogitantis jugis recordatio.* (*S. Athan. in vita c. 22.*) Consternatur Dæmon, ubi servum Dei hilarem, suoque contentum cœlesti Domino viderit, nesciens, unde illum aggredi, quibuscque capere illecebris queat; ideoque vel non au-

audet ità præparatum laceffere; vel si aleam certaminis tentet, vix periculo virium fa-cto cum clade, & ignominia discedit. At, si contra perturbatum, & mœrore dejec-tum, sibique displicentem intueatur; magna vi, ceu facilem prædam invadit, ponénsque ipsi ob oculos, hinc præsentem novi sui statūs mœstitudinem, prioris indè vitæ amœnitates, risus, hilaria, & delicias adeò ex omni parte urgere illum pergit, tamque vivida sub imagine blanda hæc objecta illius animo exhibit, ut miser alleviari illa specie interiorem sui cordis ægritudinem sentiens, non omnino in discrimine succumbendi ver-setur. Quæ res Joannem Chrysostomum impulit, ut pronuntiaret, (l. 3. de provid.) *Omni actione diabolica potentiorē esse ad no-cendum mœroris magnitudinem. Nam & Dæmon, quoscumque superat, per mœrorem superat. Eum si au-feras, nihil à Dæmone quisquam lœdi poterit.* Quæ res spiritualem quemvis virū deberet impel-lere, ut tristitiam nihilo quam Diabolo minùs vitaret: nec ullo unquam aditu penetrare in suum animum sineret: sed memoriâ repe-tens Dei amicum se esse, utque talem ab eo intimè diligi, nec longum post tempus ad æternam cœlestis illius regni hæreditatem capessendam vocatum iri; ex cogitationi-bus tam jucundis uberrimi gaudii pabulum duceret: deque sua sorte lætissimus repe-teret secum: quærant alii aliunde materiem gaudendi, unus mihi ad plenissimam hilari-

tatem sufficit Deus. *Eligant, qui volent sibi partes de rebus. Pars mea, & hæreditas mea Dominus.* (Aug. in Ps. 34.)

4. Neque minùs præclarum spiritualis lætitiae meritum est, roborare animos ad difficillima quæque perfectionis Christianæ exercitia promptè, alacritérque obeunda: ut de se profitebatur sanctus Rex David, Deo canens: (Ps. 118.) *Viam mandatorum tuorum cucurri, cum dilatasti cor meum:* & ut nostrūm quisque experitur, qui afflante præcordia sacræ hilaritatis vigore, nullas virtutis asperitates horrescimus, fræno potius, quàm calcaribus in divino famulatu indigemus, nec facilem modò, sed & jucundam corporis afflictationem, laborūmque & injuriarum tolerantiam sentimus. Cùm contrà, ubi mœror incubuit, omni destituamur operandi alacritate, ipsummet laboris nomen nos defatiget, ut vix pedem humo tollere præ imbecillitate possimus, post que singulos penè gressus subsistere ad respicendum cogamur. Quare D. Ambrosius meritò affirmat, Evangelici suavitatem iugi non aliunde, quàm ex bona hilariter ei succollantium habitudine profici: quibus propterea tam leve ipsum accidit, quàm tristibus grave, & intolerandum videtur. (Or. de Ob. Valent.) *Potest jugum videri grave pondere discipline, suave tamen fructu gratia, spe remunerationis, purioris conscientia suavitate.* Nec minùs commodè sanctus Thomas Villanova-

novanus in mysticis illis apud Ezechielem rotis, quæ, (c. 1.) quocunque ibat spiritus, pariter elevabantur, sequentes eum. Spiritus enim vita erat in rotis, animas repræsentari ait spirituali suavitate imbutas, quæ ab interiori hac spiritu sancti unctione miram agilitatem trahunt ad volandum, nedum currendum, quocunque ille impulerit. (Serm. de S. Dor.) Spirituales animæ designatae sunt per illas rotas, quæ, ubi erat impetus spiritus, illuc gradiebantur. Unctæ enim sunt oleo devotionis sancto, & ideo ad omnem virtutis motum faciles sunt. Machabæi, sacro eorum Historiographo teste, (l. 1. c. 3.) præliaabantur prælium Israël cum lætitia: atque hinc fiebat, ut tot, tamque insignes de validissimis cæteroqui hostium copiis reportarent victorias. Nec secùs nobis quoque eveniet, si eadem cum exultatione animi contra hostem tartareum pro Dei gloria, & nostra incolmitate pugnemus. En Apostolum Christi Andream, usque adeò patibuli sui aspergili nîl territum, ut festivis potius, amicisque illi vocibus blandiatur: *Salve crux diu desiderata, & jam concupiscenti animo præparata. Securus, & gaudens venio ad te.* Undenam, inquit D. Bernardus, hoc existit tam mirabile, invictumque animi robur, nisi ex divini amoris suavitate à Spiritu sancto ipsi infusa? Quæ si in cordibus item nostris vigeret: *adjuvaret sinè dubio infirmitatem nostram, & sicut B. Andrea crucem, & mortem ipsam,*

sic nobis quoque laborem , & pœnitentiam nostram faceret , non solum non molestam , sed etiam desiderabilem , atque omnino delectabilem esse . Spitus enim meus , ait Dominus , super mel dulcis , ita ut ne ipsa quidem prævalere queat ejus dulcedini amarissima licet mortis amaritudo . Quid non temperabit illa dulcedo , quæ mortem etiam facit esse dulcissimam ? Quæ resistere possit asperitas unctioni illi , quæ mortem facit suavissimam ? (Serm. 2. de S. Andr.)

5. Præterea neminem fugit , tantò nostris operibus plus perfectionis , & apud DEum meriti accedere , quantò attentiùs , & pleniori cum voluntate fuerint peracta . Atqui , si Aristoteli , & Doctori Angelico credimus ; (Ar. L. 10. Eth. c. 5. & 6. S. Th. 1. 2. qu. 34. a. 4.) talia esse in primis solent , quæ gaudens animus facit . Delectationis siquidem pabulum in eorum actu reperiens , nihil causæ habet , cur aliò cogitationes , & curas avertat , prout solenne cæteroquin ipsi est , quando ex tristitia , aut necessitate operatur : sed , quidquid temporis , studiique requiritur , iis exactè absolvendis libenter impendit : simili ratione , ac palatum cibos sibi arridentes , quantum factu usus est , mandit , versatque ; catapotia verò , & ingrati saporis pharmaca exorbere quantocyùs festinat . Unde etiam fit , ut quisquis disciplinam , artémve aliquam ex animi sui sententia delegit ; multò ulteriores progressus cernatur in ea facere , quam

si

si eidem invitâ minervâ , & coactus operam navet. Quod cùm probè Athenienses intelligerent , teste Gregorio Nazianzeno , priusquam suos liberos huic , vel illi professioni addicerent , explorare illorum pensionem consueverant , dispositis ante ipsos variarum artium instrumentis : (Epist. 117.) Ut , qua quis delectabatur , & ad quam sponte currebat , eam doceretur. Denique , quod cum tristitia facimus , nunquam , judice D. Thoma , ità bene facimus , sicut illud , quod facimus cum delectatione , vel sine tristitia. (1. 2. qu. 37. a. 3.) Quocirca quantæ nobis curæ est , ut grata divino conspectui sint , quæ agimus ; tantæ esse item debet , ut ea gestienti animo , & cum alacritate obeamus. Alioquin , quomodo placere poterimus Domino in ceremoniis mente lugubri ? (Vid. Levit. c. 10.) cùm ille testatus planissimè per Apostolum sit , se hilarem datorem diligere. (2. ad Cor. 9.)

6. Adjice supradictis lætitiae fructibus fo-
mentum , quod ex ipsa DEI , proximique
amor capit. Cùm enim insitum à natura
cuivis amori sit , cor dilatare , & animum
interiori suavitate perfundere ; fieri non po-
test , quin plurimum ille habeat & affinita-
tis cum lætitia , cui plūs , quām alteri cui-
quam affectui suæ hujusmodi proprietates
conveniunt ; & dissensionis à tristitia , quæ
maximam unà contrarios effectus producen-
di vim obtinet. Præterquam quod spiritua-
lis

lis lætitia ex DEI , & bonorum cælestium amore suam originem dicit : ideoque, velut calor ab igne in materia excitatus , hanc illi vel concipiendo , vel , si in ea conceptus jam sit, conservando , fovendoque , habiliorem reddit ; sic & ipsa amorem divinum , à quo producta in animo est , nutrire in eodem , ac tueri consuevit. Nec minus , quam ratio , experientia id persuadet. Videmus nempe homines , qui sereno , & hilari animo sunt , peculiari cum facilitate , ac propensione in divinæ charitatis actibus sese exercere : eosdémque ad bene merendum de proximis , & illorum tum imperfectiones leniter feras , tum calamitates amanter sublevandas , promptos quam qui maximè esse : contrà omnino , quam ab hominibus tetricis , & importuno mœrore affectis fieri consuevit , quibus nihil plerumque est in quotidiano convictu insuavius , nihil aliorum vitiis , atque erratis æquum minus , nihil ad invidiā , ad iram , ad pejora suspicanda , adque sodalium actiones fugillandas , & sinistrorum detorquendas proclivius. Unde B. Laurentius Justinianus causam habuit scribendi : *Non habet locum mœror , ubi sancta caritas posuit habitaculum.* Augmentum charitatis tristitia diminutio est. Certum namque est , quod Deus deprimentem non approbat tristitiam , cum tantis præconiis extollit charitatem. (De Discipl. & Perf. Mon. Conv. c. 16.)

7. Hæ

7. Hæ porrò utilitates ut testatores ad-huc sint, juvat eas duobus exemplis comprobare, quæ legisse olim memini in vita Nicolai Zucchii, viri è nostra Societate, non vulgarem sanctitatis famam elapso proximè sæculo adepti. Primum suppeditat Religiosa mulier, quæ magno perfectioris vitæ studio permota, Zucchii institutionem expetiit: accitóque ad cœnobium Patri inquit, ego sancta esse vellem; quid, ut talis sim, facto opus mihi est? DEI famulus, cui doctrina hujus capit is penitus defixa in animo erat, nihil ei aliud suggestit, nisi illum Psalmi trigesimi sexti versiculum: *Delectare in Domino, & dabit tibi petitiones cordis tui*: monens etiam, atque etiam, curaret, proponere DEum in principio latitiæ suæ, quæ illi placerent voluptati sibi ducere ex illius memoria, consuetudine, & obsequiis capere suarum delectationum materiem. Ità ille tunc temporis: quidque frugis in audentis animo cœlesti id semen peperisset, non nullis post annis rescivit: quando nimirum ad eandem fato jam proximam locò sacerdotis, quem illa nominatim sibi mitti postulârat, (cùm is nescio, quo impedimenti genere prohiberetur) ablegatus ipse est. Excepit gaudens agnatum ægrotam mulier, útque vicissim ab eo recognosceretur, commemoravit ei Davidicum illud, *Delectare in Domino*, quô ad sanctitatem consequendam instructa jam dudum ab eo fuerat.

X 5

Et

Et hanc quidem , subjicit , longissimè abs-
est , ut consecuta ego sim , non alia , nisi
ignaviæ meæ causa. Quamvis sancta etiam
vocari haud temerè possim , si mecum con-
ferar , qualis olim fueram , priusquam uti
tam salubri monito inciperem ; & in dicti
sui fidem exposuit , quot , quāmque insig-
nibus donis cumulata à DEO fuisset , ex
quo suam omnem lātitiam , & delectatio-
nem in eo collocare instituerat. Exquisitis
demum Patri actis pro fructuosissima insti-
tutione sua gratiis , ab eoque ad supremum
iter confirmata , inter plenas amoris cum
DEO collocutiones piè obiit. Alterum ex-
emplum huic simillimum , & prorsus ge-
mellum in juvēne accidit : qui & ipse mi-
graturus è vita , eundem DEI servum mo-
rienti sibi aedes ad supremæ necessitatis so-
latium magnopere optavit. Cūmque hic
evocatus præsto esset , æger lāto vultu , &
per amantibus verbis eum excipiens ; proh
quantum , ait , Pater , tibi debeo ! octo
menses jam sunt , cūm ad te accessi , do-
cumentum aliquod postulans , unde ad æ-
ternam salutem , & spiritualem animæ pro-
fectum juvarer. Tu brevi sermonis , do-
ctrinæque compendio tria duntaxat hæc ver-
ba , *Delectare in Domino* , ut memoriae in-
culperem , & studiosè observarem , præ-
cepisti. Felix sanè præceptum , & de quo
jure profiteri cum Hebræo sapiente possim ,
venerunt mihi omnia bona pariter cum illo , &
innu-

innumerabilis honestas per manus illius (Sap. c. 7.)
Quantas enim utilitates per totum hoc tempus ex usu illius ceperim , non invenio , quibus verbis dignè exprimam. Testimonia tibi sit hoc folium , ubi earum nonnullas descripsi : cùmque dicto Patri folium porrexit : quod ille , tanquam præclarum divinæ liberalitatis erga deditas sibi animas monumentum , longo post excessum juvenis tempore asservatum penes se voluit : nunquam illud relegens , quin exultaret in Domino , & novos flagrantioris erga ipsum charitatis ardores conciperet. (L. 2.c. 6.)

8. Si ergo & sacra eloquia adeò disertè nos hortantur ad lætandum in DEO , & tam ratio , quàm experientia palam ostendunt , nihil esse animabus spirituali hac jucunditate utilius ; quisnam ultrà erit , qui eam in DEI servis vituperare ausit , perinde quasi nimiam virtutis suæ confidentiam in eorum animis foveat , & sensibili captos dulcedine non sinat , pro eo ac perfecta virtus requirit , solidioribus aliis corporis castigandi , geniique subigendi exercitiis vacare ? Profectò , si noxii hujusmodi effectus communiter provenire ex ea solent ; quæro primùm , quonam pacto Spiritum sanctum latuerint , dum eam toties tam in veteri . quàm in nova Lege suaderet , commendaré que. Præterea , esto spiritualem lætitiam sua circumstent pericula , nullisne obnoxia est tristitia ? An potius , ut suprà demon-

stratum est, aliis compluribus, neque iis
sanè remotis, ac fortuitis, sed penitus
sibi, & naturæ suæ insitis? Non itaque ad
prudentiam pertinet, ea omnia declinare,
ubi aliquod noxæ, atque fraudis discriminem
occurrat. Alioquin per nullam incedendum
spiritualis vitæ semitam foret: uti nullam
est reperire ab omni offendiculo vacuam, &
ubi complures suam lapsi per vecordiam
non sint. Sed proprium cordati cujusque
viri est, eam præ aliis eligere, cuius peri-
cula majoris momenti utilitatibus compen-
sari solent. Qualem esse spiritualis potius
lætitiae, quam spiritualis mœstitiæ semitam,
quæ hactenus disputavimus, sat perspicue
demonstrant. Tota quippe alterius perfe-
ctio, atque utilitas in suis jugiter deploran-
dis criminibus, sëque illorum causâ depri-
mendo consistit. Quibus tamen bonis affi-
ne est periculum, ne infelix malorum comi-
tatus, dejectio animi, stupiditas mentis,
spei languor, charitatis tepor, tædium in
orando, inque agendo segnities accedat.
Cùm sancta hilaritas, & nullus hujuscemodi
vitiis laboret, & proprias affectus con-
trarij utilitates præstantioribus aliis abundè
compenset: facilitate nimirum, quam se-
cum unà animo infert repudiandi bonorum
sensibilium illecebras, spiritualis vitæ aspe-
ritates generosè invadendi, orationi liben-
ter vacandi, & virtutum omnium, sed præ-
cipue charitatis officia impigrè, alacritér-
quas

que exercendi : neque interim occasiones ,
quas præbere homini potest , sive arrogan-
tiæ , sive immodicæ securitatis , sive in sen-
sibili ejus dulcedine , tanquam in Christia-
næ totius perfectionis summa acquiescendi ,
adeò superatu difficiles sint ; ut præ mali
tam dubii , ac remoti formidine præclaris-
simis , & certissimis aliis illius emolumen-
tis nuntium nos remittere expediat . Audi-
amus , quænam hic fuerit D. Laurentii Ju-
stinianni sententia . *Consultiùs , securiusque*
(scribit ille) *dulcedo devotionis , & spiritualis*
lætitia in pia DEI , quām tristitia pro communi
usu capienda est . Rationémque hanc dicti sui
reddit , quia cùm DEI famulus ab omnibus
genii oblectamentis abstinere se debeat , &
assiduum cum suis tam corporis , quām ani-
mi cupiditatibus bellum gerere , neque pau-
cas præterea partim à morbis , & naturæ
imbecillitate , partim à diabolo , illiusque
administris subire infestationes cogatur ;
necessè est , ne succumbat , ut spirituali lætitia ad
tolerantiam animetur . Proinde prudentissimum
censendum est , & DEO gratum ; ut DEI ser-
vus , pondere miserrima carnis prægravatus , à dæ-
monibus tentatus , ab hominibus laceitus , cu-
ris temporalium occupatus , & à visibilium volup-
tati illectus , DEO suo semper in spiritu ex-
ultatione servire contendat : maximè cùm ad hoc
divina exhortatione moveatur , dicente Pro-
pheta , servite Domino in lætitia . Cui enim An-
gelorum consortium , cælorum possessio . DEI vi-
du-

sio, & cœlestis repromittitur gloria, debetur indubitanter cordis lœtitia. Sub quæ Religiosos speciatim Viros alloquens, ita orationem concludit. *Tu itaque, ô serve Christi, tu, inquam, qui ex miserantis DEI dono ad monasticam vocatus es conversationem, depone cunctum animi mœrorem, & omnem tristitiam te deprimentem, & in Domino semper gaude, qui te de cœnoso sæculi naufragio assumere, in loco securitatis, voluptatis, & pacis collocare dispositus. Te enim de tenebris delictorum in admirabile lumen gratiæ suæ vocare, te collegio Sanctorum suorum aggregare, te in ministrum suæ laudis eligere, tibi incerta, & occulta sapientia suæ revelare, tibi judiciarium potestatem, & vitam aeternam promittere ineffabili bonitate dignatus est. Tibi iterum dico, qui talis es, gaude in Domino, ut illi alacrius, & ardentius valeas famulari, ut per dilatationem jucundissimæ charitatis expeditius viam mandatorum ejus currere queas, ut per jugem gratiarum actionem, & ignitum cordis amorem amabiliorum te illi exhibere queas. Pro his causis secure, & indubitanter gaude.* (De Disc. & Perf. Mon. Con. c. 16.)

9. Atque hinc videmus tam arctum inter amicam cum DEO necessitudinem, sanctamque in DEO exultationem fœdus intercedere, ut vix alteram ab altera separari unquam contingat: sed, quanto quisque in illa plus proficit, tanto hac ferè sit plenior: ideoque verum, & oraculi instar appareat, quod Clemens Alexandrinus pronuntiavit,

(L.

(L. 7. Strom.) Universam justi vitam celebrem quemdam, sanctumque esse diem festum. Et quam vis hæc jucunditas , ut bonum animi proprium , non semper , neque in omnibus DEI amicis exterius promineat , sed eorum multi pro externa vivendi austeritate videantur quasi tristes ; quam plurimi tamen expressum vel in ipso oris habitu interioris lætitiae jubar præferunt. In cuius rei exemplum satis mihi erit paucos quosdam hic afferre , & eos quidem non aliunde , quam ex tetrico eremi squalore productos. Talis certè fuit S. Abbas Pachomius , qui , ut in vita ipsius traditur , (c. 53.) Quamvis toto corpore attenuatus esset , faciem tamen habebat hilarem. Talis Romualdus , severissimæ Camaldulensis familiæ Institutior , de quo Romani Breviarij Lectiones testantur , vultu adeò semper lato fuisse , ut intuentes exhilararet. Talis Abbas Theonas , quem , si Palladio testi oculato credimus , quamvis solitariâ cellula inclusus perpetuum ad triginta annos silentium prorogasset ; (Hist. Lauf. c. 50.) Licebat videre habentem vultum Angeli , latis oculis , & totum plenum maximâ gratiâ. Talis magnus monasticæ vitæ Author , Antonius , quem D. Athanasius refert , in quantavis , Monachorum multitudine potuisse ab iis , quibus nunquam antea conspectus fuerat , per extraordinariam quandam è vultu prominentem lætitiam dignosci : Nam semper faciem hilarem gerens liquido ostendebat , se de cælestiæ

stibus cogitare. Addens præterea , hujus lætitiae tenorem adeò immotum fuisse , ut nunquam recordatione peccati tristitia os contraxerit ; ac proinde vix quemquam è tam multis , à quibus conveniebatur , repertum , qui eo viso , auditóque *tristitiam non mutarit in gaudium.* (*In vit.c. 40.13. 55.*) Talis demū numerosa illa Apollinis vel Apollonii Abbatis familia , quingentis ferè Monachis constans , de cuius mira , communique hilaritate commemoratus paulò antè Palladius hæc habet : *Licebat eos videre exultantes in solitudine , adeò ut nullam ejusmodi exultationem videre aliam liceat , nec latitiam corpoream.* Neque enim erat inter eos aliquis mæsus , aut tristis : excitante nimis rum , ac fovente hos in omnium animis sensus , ipsomet universi cœtū sapientissimo Magistro , & Parente : *Qui identidem monebat eos , dicens , non oportere prorsus inesse tristitiam his , quibus salus in DEO est , & spes in regno cœlorum.* Tristentur , ajebat , gentiles & lugeant Judæi , plangant sine cessatione peccatores : *Justi verò latentur.* Nam , si hi , qui terrena diligunt , super fragilibus , & caducis rebus latantur ; nos , qui tantæ gloriae spem , & æternitatis habemus expectationem ; cur non omni exultatione latemur ? Aut non & Apostolus nos ita monet , dicens , semper gaudete ? (*Hist. Lauf. c. 52. & Rosw. in V. Patr. L. 2. c. 7.*)

10. Tales , inquam , hi fuere , aliisque inter DEI famulos plurimi. Et talis vellem , tu itidem essem , amice Lector , studens ,
vul-

vultūs , & consuetudinis hilaritatem con-
jungere : ut , quantum ex prima utilitatis
ipse capies , tantum aliis per secundam uti-
lis fias . Nimis quippe innata , & commu-
nis humano generi est , ut ad jucundam vi-
vendi rationem propensio , sic à tetrica , &
tristi alienatio . Nihilque validius profanorum
hominum vulgus à spirituali vita capeſſenda
avocat ; quamquid eam instar larvæ con-
cipiunt , luſtum undique , & horrorem spi-
rantis , adeò ut nomen illi dare idem sit ,
ac æternum vale risui , & lætitiae dicere .
Qui profectò , si in famulorum DEI vultu ,
& congressu amœnum quoddam iutueantur
modestæ quidem , sed sinceræ jucunditatis
ver efflorescere : credi vix potest , quantò
æquiorem erga sancta eorum instituta ani-
mum sumant . At , si contra illos externa
omni specie ad mœſtitiam compositos cerne-
rent ; quotusquisque non videt , confirmata
cum inde iri , quam de divinæ servitutis te-
tricitate persuasionem mente imbiberunt ,
horrorēmque consequenter , & metum ,
quo eandem idcirco aversantur ? Vedit cer-
tè id Annæus Seneca , causamque inde sum-
psit præcipienda Philosophiæ ſectatoribus ,
ut in corporis habitu , vivendique uſu hu-
manos ſe , & comes exhibeant . (Ep . 5 .)
Alioquin , ſubdit , quos emendari cupimus , fu-
gamus , & à nobis avertimus . Unde etiam col-

Y

ligi

ligi potest, uternam aptiorem ad conciliandos spirituali vitæ Auditores suos, Lectoresque insistat viam: illéne, qui eam professuris opus esse prædicat, assiduo in mœrore, atque lucetu ætatem traducere, nihil aliud mente unquam volutando, & habendo præ oculis, nisi crimina admissa, iratum Numen, sempiternæ mortis pericula, aliásque hujusmodi feralium objectorum imagines? an qui eam docet, verius esse, qualis à cælesti suo Institutore appellata est, *jugum suave*: adeò ut nemo jucundiùs vivat, quam qui eam profitetur: justas quippe habens causas DEum intuendi, veluti suum amantissimum Patrem, & cælestè illius regnum, veluti suam sempiternam hæreditatem: objecta certè tam delectabilia, ut eorum ruminatio libamentum quoddam vide ri futuræ beatitudinis queat. Certè si observemus artes contrarias, quibus hinc Deus ad se trahere, dæmon indè ab eo revocare animas solet; palam videbimus, suam à primo servitutem iis repræsentari, tanquam facilem, jucundam, & hilarem; ab altero autem, quasi asperam, tristem, & horridam. Quocirca imitetur hic, cui cunque ita libet, dæmonem, capitalissimum animarum hostem: ego utique satiùs arbitror, DEum imitari, benevolentissimum carum Parentem.

II. Su.

¶. Superest duntaxat videre, quoniam pacto perpetua haec hilaritas, quam veluti animarum divino famulatu, & amori vacantium, propriam commendavimus, cum quibusdam conveniat, primo ipsi aspectu adversantibus sacrorum Volumintum dictis: qualia nonnullis videbuntur tum ea Christi Domini verba, quibus & beatos appellat, qui lugent (Matth. 5.) & discipulis suis fletum, mœrorēmque prænuntiat, dicens: *Plorabitis, & flebitis vos, mundus autem gaudebit: vos vero contristabimini;* (Joa. 16.) tum illud Davidis de se testimonium, (Ps. 37.) *Tora die contristatus ingrediebar:* nec dissimile alterum D. Pauli, ubi scribit: (Ad Rom. 9.) *Tristitia mihi magna est, & continuas dolor cordi meo.* Ad hanc igitur oppositionis speciem è medio amoliendam, dico primū, luctus, & mœroris nomine ordinarias interdum significari ejus causas: insectationes nimirum, compedes, plagas, & id genus ærumnas, unde tristitia excitari naturaliter solet. Et hoc utique in sensu accipienda est illa Christi prædictio: *Plorabitis, & flebitis vos, mundus autem gaudebit:* nempe quasi tunc dicat, mundus præsentis vitæ bonis fruetur: vos vero contraria illis mala exterioris affligerent. Quemadmodum in eodem significatu alteram quoque sententiam, *Beati, qui lugent,* accepit Petrus Chrysologus; Psalmum explicans nonagesimum quartum.

Cùm enim , recitatis illius primis vocibus : *Venite , exultemus Domino , sibi subjecisset , & ubi est illud , Beati , qui lugent , & vœ vobis , qui ridetis ?* respondet confessim , (*Serm. 47.*) *Plane beati , qui lugent mundo , id est , qui à mundi oblectamentis se abstinent : & vœ ! qui rident mundo , nimirum , qui se mundi bonis oblectant.* Sed hic enim verò vel solius corporis , vel appetitūs quoque inferioris dolor nullam vim habet perturbandæ jucunditatis , & lœtitiæ , quam amantes DEum animæ ex illo , ac cœlestibus illius bonis in suprema sui parte percipiunt : quin imò eam solet potiùs intendere , ab eaque è contrario mitigari , nec raro etiam prorsus extingui. Sancti enim Viri , quantò graviora pro DEO patiuntur exterius : tanto ex DEI amore plūs exultant interius. Tantaque interdum hæc illorum spiritualis exultatio est ; ut vel non advertant , vel malorum locò non habeant , nulloque adeò cum ægritudinis sensu excipiant , quæ humanitus dura , & perpeſsu moleſta ſibi accidunt.

12. Dico præterea , nunquam mihi id mentis fuisse , ut nullum vel interioris tristitiae genus agnoscerem , sanctum , laudabile , & servorum DEI proprium. Hujusmodi enim procul dubio est omnis tristitia , quæ ſeu de nostris malefactis concipitur , & juxta D. Paulum , (2. ad Cor. c. 7.) *Pœnitentiam*

in

in salutem stabilem operatur ; seu mala proximorum commiserans , solet flere cum flentibus ; seu nostram in terrestri hoc exilio absentiam à DEO pro materia lugendi habet , cogens exclamare animam : *Heu mihi , quia incolatus meus prolongatus est.* Fuerunt mihi lacrymæ meæ panes die ac nocte , dum dicitur mihi quotidie , ubi est Deus tuus ? Illud tantum statuo , nullum ex prædictis sanctæ , ac fructuosæ tristitiae generibus cum ea spirituali lætitia pugnare , quam hoc capite commendandam suscepi. Esto quippe , gaudium , & mœror sibi mutuò aduersentur ; hoc tamen non accidit , nisi quando in appetitu sensibili excitantur , & resident. Nam cæteroqui , quando actus sunt à naturali appetitu liberè eliciti , nullam inter se oppositionem habent , sed intrà voluntatem amicè , & socialiter cœunt. Imò tristitia , si secundi hujus generis sit , potest voluntati , juxta D. Thomæ sententiam , esse causa gaudendi : idque ex dupli capite : primò scilicet , ratione utilitatis , quam veluti honestus , & laudabilis suus actus ei affert. Voluntas , & ratio (sic ille) supra suos actus reflectuntur : & hoc modo tristitia potest esse materia delectationis , non per se , sed per accidens , in quantum scilicet accipitur in ratione boni. Secundò autem , quia memoriam , ideoque & amorem delectabilis cuiuspiam objecti in animo renovat. Dicendum (en verba ejusdem

dem) quod dolor ipse potest esse delectabilis per accidens , in quantum scilicet facit recordationem rei amatae , & facit percipere amorem ejus , de cunctis absentia doletur . Siquidem , cum amor sit delectabilis ; & dolor , & omnia , quae ex amore consequuntur , sunt delectabilia . (I. 2. qu. 35. a. 2. ad 2. & ad 3. & qu. 32. a. 4. & 3. p. qu. 83. a. 2. ad 2.)

13. Et revera interius famulorum DEI gaudium à triplici supradicto mœrore augeri potius , quam minui , facile cuivis cognitu est . Nam , si primum illius genus intueri libeat , nempe eum dolorem , quo anima DEI amans suam in eo toties offendendo præteritam improbitatem deplorat ; haud tardè in ipso agnoscemus eam affectus amari simul , & suavis , antithesin , quam Johannes Climacus admiratum se ibi esse profitetur his verbis , (Gr. 7.) Evidem com punctionis vim considerans stupeo , quoniam modica , quae luctus , & mœror dicitur , gaudium intrinsecus , ac latitiam , veluti mel , & favum , comesta possideat . Imò etiam perspicue videhimus , neque occasionem esse de illa admodum obstupecendi , tanquam de effectu naturæ absōno , sed manifestas , pérque validas rationes existere , cur , qui dolorem ejusmodi animo concipit , suavitatem inibi reperire , ac dulcedinem debeat : tum quia nequit illum concipere , quin eodem tempore divinam bonitatem , pulchritudinem que ,

que , vel unicum , vel præcipuum illius incitamentum sibi repræsentet , ac diligit ; tum quia , de suis malefactis dolendo , scit DEO se gratificari , quo nihil in tota rerum universitate plùs amat ; tum quia per occasionem detestandi injurias à se olim ei factas , benignitatis simul meminit , qua condonatæ sibi ab eo sunt ; tum denique , quia , quantum horret magis pristinam suam exosi DEI capit is sortem , tantò indè clariùs intelligit præsentem reconciliatæ cum eo amicitiæ felicitatem : objecta sanè singula mirè ad delectandum idonea , quæque illum de peccatis mœrorem incredibili suavitate respurgunt ; adeò ut , ceu à D. Gregorio animadvertisit , (In Ps. 2. Pœnit.) infirmitatis sua excessus deplorans , indè refectionis intimæ dulcedinem sentiat , unde vim suavissimi amoris per lacrymas emittit . Idem dic de secunda etiam ægritudine animi , quæ in contemplandis reliquorum mortaliū ærumnis à fraternâ erga illos charitate producitur . Cùm & ipsa , quaquaversum spectetur , sive ut actus supernaturalis magni nobis meriti ad divinæ gratiæ incrementum ; sive ut intimi adversus DEum , proximosque amoris exercitatio nequeat , secundum prolatas paulò antè Angelici Doctoris rationes , jucunditatis suæ fructu carere . Idque adhuc manifestius colligitur ex miserationis eo sensu , quo tragicos eventus sive in historiis legentes , sive

in scenis spectantes afficimur : sensu nimis
rum , quem unusquisque perlibenter in se
ipso experitur , studiose illius causas , &
stimulos quærens , tantisque plus voluptati-
tis percipiens ; quantò ille vehementius si-
bi animum fodit . Nec diversa tertii item
mœroris est ratio , mœroris videlicet , quo
animæ DEum amantes ex illius absentia di-
scruciantur , atque , ut sic loquar , tabescunt .
Cùm enim non aliunde is proveniat , quām
ex altè concepta animo divinæ pulchritudi-
nis specie , ardentissimāque cupiditate , &
certa propemodum spe illius quandoque in-
tuendæ ; ut nihil hujusmodi incitamentis est
dulcius ; sic nullis explicari verbis sat potest
quanta dulcedine , quos afficit , repleat :
ipsosmet fletus in sapidissimum iis pabulum
vertens , adeò ut jure possint cum Psalmista
canere : *Fuerunt mihi lacrymæ meæ panes die ac
nocte , dum dicitur mihi quotidie , ubi est Deus
tuus ? (Ps. 41.)*

14. Adverto nihilominus , hosce affectus
doloris , quamvis suavitate permistos , ne-
que ideo spirituali lætitiae adversantes , haud-
quaquam ità assidue exercendos , tamque
diu continuandos videri ; ut ne justum aliis
divini amoris affectibus jucundis , & tran-
quillis locum relinquant . Neque mea hæc
est animadversio , sed à D. Laurentio Ju-
stiniano mutuata , qui cùm dixisset , (De
Disc.

Disc. & Perf. Mon. Conv. c. 16.) *Animam Dei amantem contrastari de admissis criminibus, non propter se, sed eum, cuius contempnit imperium, ut satisfaciat dilecto, ut revocet illum ad se, quem propter culpam à se declinasse cognoscit, haud perpetuum in ipsa manere hunc dolorem subdit, sed tamdiu, quamdiu revocat dilectum: quem, mox ut ad cordis sui habitaculum appropiare per internam intelligit aspirationem; cunctum, quem prius conceperat, abicit mœrorem, se reddit hilarem, se jucundam facit, ut lata facie occurrat venienti.* Idémque sentire visus est Seraphicus Pater Franciscus (*Apud Rodr. P. 2. tr. 3. c. 7.*) Cùm nescio, quem è suis conspicatus, tristi, & nubila oris specie, importunum ejusmodi mœrorem redarguit, dicens: mœrendum DEI servis non esse, nisi alicujus patrati fors criminis causâ; neque etiam tunc longius, quàm dum illud sibi fuerit remissum. Si ergo peccati conscientia te mordet, Prophetæ pœnitentis exemplo DEum ora, ut illius tibi veniam indulgeat, animique simul pacem & jucunditatem, qua prius fruebaris, restituat: *Redde mihi latitiam salutaris tui, & spiritu principali confirma me.* (*Psf. 50.*) Sed in primis utendum hac regula est, circa quotidianas, & leviores noxas, adeò ut in earum quampiam ex humana fragilitate incidentes, post brevem pœnitentiæ actum pristinam continuò alacritatem, & quietem animi resuma-

mus, tanquam si nil ejusmodi commissum à nobis fuisset. Nam alioqui, si in tanta communiter id genus culparum frequentia diu permanere oporteret conceptam de una- quaque ægritudinem; quodnam nobis tempus ad suaviter, quieteque agendum cum DEO supereriset? Præsertim quòd dolor seu de ordinariis, & venialibus culpis, seu de ipsismet capitalibus, & mortiferis, quarum rei olim fuerimus, potest modum excede- re, non solum si justo diuturnior sit, ver- rùm etiam si turbulentus, & inquietus adeò ut animum diffidentia, & consterna- tione dejiciat; ut prudenter observavit Mar- cus Eremita in suis de paradiſo capitibus, ubi salutiferam, utilémque pœnitentiam à no- xia distinguens: *Quædam est, inquit, con- tritio cordis recta, & utilis tendens ad ejus illu- strationem: est & altera perversa, & noxia, ten- dens ad perturbationem ipsius* Quocirca, quan- ti momenti est ad vitæ spiritualis profectum ingenti cum alacritate, ac vigore animi per illius semitas tendere; tanto studio provide- ri à DEI famulis convenit, ne turbulento huic dolori locum unquam in suis cordibus præbeant: curando videlicet, ut tristitia, quam interdum de suis malefactis concipi- unt, sit juxta Cassiani præscriptum (*L. 9. de Sp. Trist. c. 11.*) *Mansueta, suavis, quo- dammodo lata, & spe profectus sui vegeta.* Qua- lis utique erit, si non aliunde, quam à divina

divina charitate originem ducat ; nec ab animosa , & suavi disjungatur divinæ benignitatis fiducia.

15. En igitur , quonam pacto , qui per vias divini amoris incedit , quamvis non omittat jam propria delicta , jam alienas calamitates , prout tempus , résque tulerit , considerare , & deflere ; perpetuam nihilominus spiritualis lætitiae jucunditatem in animo foveat. Fovet eam jugiter , quia & plurimum temporis ponit in ruminandis materiis , nihil , nisi suave exhibentibus ; (quales sunt exempli gratiâ infinita DEI tum in se ipso amabilitas , tum erga nos bonitas , ejusque suæ præsens , utpote amici , seu posthuma , utpote in æternitate parata felicitas) & , quando ad alia tristiora objecta se vertit , in iis quoque , ut jam vidi mus , uberes venas novæ delectationis nanciscitur : nihil aliud præstante nativa eorum amaritie , nisi ut sensibilior , gratiorque fiat ordinarii pastûs dulcedo. Quam si unam semper , ac sinè ulla contrarii saporis vicissitudine , aut temperatione gustaret , brevi præ nimia assuetudine minus jucundam experiretur , imò etiam aspernari , & fastidire eam inciperet ; velut ipsum manna , etiamsi Angelorum panis ; & quædam saporum quasi universitas esset ; quia tamen unus , atque idem cuiusvis diei cibus , in fasti-

fastidium Judæis vertit, adeò ut nauseabundi exclamarent: *Nihil aliud respiciunt oculi nostri, nisi Man. Anima nostra jam nau- seat super cibo isto levissimo.* (Numer. 6. 11. & 21.)

F I N I S.



